

**Petikan dari Kitab [Zabur Surah 18](#).**

*Untuk pemimpin muzik. Mazmur Daud, hamba Tuhan. Dia telah menuturkan kata-kata dalam lagu ini kepada Tuhan pada hari Tuhan menyelamatkannya daripada semua musuhnya dan daripada Saul. Kata Daud:*

<sup>1</sup>Aku mengasihi-Mu, Ya Tuhan, Engkaulah kekuatanku.

<sup>2</sup>Tuhan adalah batu pejal perkasaku, kubuku dan penyelamatku;

Allah Tuhanku adalah batu pejalaku, kepada-Nya aku berlindung.

Dialah perisaiku, teras penyelamatanku, benteng pertahanananku.

<sup>3</sup>Aku akan berseru kepada Tuhan yang layak dipuji,

maka aku akan diselamatkan daripada musuhku.

<sup>4</sup>Seksa maut telah mengepungku;

banjir kejahatan mengerikanku.

<sup>5</sup>Seksa kubur mengelilingiku;

jerat kematian menunggu di hadapanku.

<sup>6</sup>Dalam kesusahan aku berseru kepada Tuhan;

Aku meraung kepada Allah Tuhanku.

Dia mendengar suaraku dari rumah suci-Nya;

raunganku sampai ke hadirat dan pendengaran-Nya.

<sup>7</sup>Maka bumi pun gempa dan gementar,

tapak bukit-bukau bergegar dan bergoncang;

kerana Dia murka.

<sup>8</sup>Dia menghembuskan asap;

dan api yang membakar,

lalu menyalakan arang batu.

<sup>9</sup>Dia menundukkan langit lantas turun;

dengan kegelapan di bawah kaki-Nya.

<sup>10</sup>Dia terbang mengenderai malaikat kerub;

Dia melayang di sayap angin.

<sup>11</sup>Dia menjadikan kegelapan tempat rahsia-Nya —

diselubungi perairan kelam dan awan tebal di langit.

- <sup>12</sup>Daripada cahaya di hadapan-Nya awan tebal berlalu,  
dengan hujan batu dan arang yang menyala.
- <sup>13</sup>Tuhan mengguntur dari langit;  
Yang Maha Tinggi mendengarkan panah suara-Nya.
- <sup>14</sup>Dia melepaskan anak-anak panah-Nya sehingga musuh bertempiran,  
Dia memancarkan kilat sabung-menyabung lalu menumpaskan mereka.
- <sup>15</sup>Maka saluran di dasar lautan terserlah  
dan asas bumi terdedah akibat kemurkaan-Mu,  
Ya Tuhan, dan hembusan hebat nafas-Mu.
- <sup>16</sup>Dia menghulurkan tangan-Nya dari langit,  
Dia menarikku keluar daripada pelbagai bencana yang menenggelamkan.
- <sup>17</sup>Dia menyelamatkan aku daripada musuhku yang kuat,  
daripada mereka yang membenciku, kerana mereka terlalu perkasa bagiku.
- <sup>18</sup>Mereka menyerangku ketika aku dalam kesusahan,  
tetapi Tuhan menolongku.
- <sup>19</sup>Dia membawaku ke tempat yang luas;  
Dia menyelamatkan aku kerana Dia berkenan kepadaku.
- <sup>20</sup>Tuhan memberiku ganjaran kerana aku melakukan yang benar;  
Dia menggantikan deritaku dengan rahmat kerana tanganku bersih daripada dosa.
- <sup>21</sup>Kerana aku telah mengikut jalan Tuhan;  
dan tidak menyeleweng daripada Allah Tuhanku dengan melakukan kejahatan.
- <sup>22</sup>Segala hukum-Nya ada di hadapanku sebagai panduan;  
dan aku tidak mengetepikan ketetapan-Nya.
- <sup>23</sup>Di hadirat-Nya aku tidak bercela  
dan aku mengatasi kejahatan dalam diriku.
- <sup>24</sup>Maka Tuhan memberiku ganjaran kerana aku melakukan yang benar,  
kerana Dia tahu tanganku bersih daripada dosa.
- <sup>25</sup>Kepada orang yang setia Engkau menunjukkan kesetiaan-Mu,  
kepada orang yang tidak bercela Engkau menunjukkan Engkau tidak bercela,
- <sup>26</sup>kepada orang yang suci Engkau memperlihatkan kesucian-Mu,

kepada yang menipu Engkau memperlihatkan kebijaksanaan-Mu.

<sup>27</sup>Engkau menyelamatkan orang yang rendah diri  
tetapi akan menundukkan orang yang angkuh.

<sup>28</sup>Engkau, Ya Tuhan, akan menyalakan lampuku;  
Allah Tuhanku akan menerangi kegelapanku.

<sup>29</sup>Dengan kekuatan daripada-Mu aku dapat melawan musuh yang ramai;  
dengan kekuatan daripada Tuhanku aku dapat melompati tembok.

<sup>30</sup>Jalan Allah itu sempurna;  
firman Tuhan terbukti benar.  
Dialah perisai pelindung semua yang bernaung kepada-Nya.

<sup>31</sup>Tiada Tuhan melainkan Allah,  
tiada Batu Pejal melainkan Allah Tuhan kita.

<sup>32</sup>Allah yang memberiku kekuatan berjuang  
dan menjadikan jalan hidupku sempurna.

<sup>33</sup>Dia menguatkan kakiku seperti kaki rusa;  
dan memantapkan jejakku di pergunungan.

<sup>34</sup>Dia melatih tanganku berperang;  
berupaya melengkungkan busur gangsa.

<sup>35</sup>Engkau telah memberiku perisai penyelamatan-Mu,  
tangan kanan-Mu telah memberiku kekuatan;  
kelunakan-Mu menjadikan aku besar.

<sup>36</sup>Engkau meluaskan jalan yang kutempuh,  
supaya kakiku tidak tergelincir.

<sup>37</sup>Aku telah memburu musuhku dan berdepan dengan mereka;  
aku tidak berpatah balik hingga kuhapuskan mereka.

<sup>38</sup>Aku telah melukakan mereka sehingga mereka tidak berdaya bangkit lagi;  
mereka telah rebah di bawah kakiku.

<sup>39</sup>Kerana Engkau telah memberiku kekuatan berperang;  
Engkau telah menundukkan di bawahku  
mereka yang bangkit menyerangku dulu.

- <sup>40</sup>Engkau telah menyerahkan nyawa musuhku ke tanganku,  
supaya aku membinasakan mereka yang membenciku.
- <sup>41</sup>Mereka berteriak, tetapi tiada siapa menyelamatkan mereka —  
malah mereka merayu kepada Tuhan, tetapi Dia tidak menyahut mereka.
- <sup>42</sup>Lalu aku menghancurkan mereka seperti debu ditiup angin;  
aku menghancurkan mereka seperti sampah-sarap di jalan.
- <sup>43</sup>Engkau telah menyelamatkan aku daripada serangan;  
Engkau menjadikan aku pemerintah bangsa asing;  
bangsa yang tidak kukenali akan tunduk kepadaku.
- <sup>44</sup>Sebaik-baik mereka mendengar tentangku, mereka taat kepadaku;  
orang asing itu tunduk kepadaku.
- <sup>45</sup>Mereka menjadi putus asa;  
dan datang dengan ketakutan dari tempat persembunyian.
- <sup>46</sup>Tuhan hidup selama-lamanya! Segala puji bagi Tuhan, Batu Pejalku!  
Segala kemuliaan bagi Allah, Penyelamatku!
- <sup>47</sup>Allah yang membalas kejahatan orang terhadapku,  
dan menundukkan bangsa asing di bawahku,
- <sup>48</sup>Dia menyelamatkanku daripada musuhku.  
Engkau, Ya Tuhan,  
mengangkatku mengatasi mereka yang bangkit menyerangku;  
Engkau telah menyelamatkanku daripada manusia yang ganas.
- <sup>49</sup>Maka itu aku akan mengucap syukur kepada-Mu,  
Ya Tuhan, di kalangan bangsa asing;  
dan menyanyi memuji nama-Mu.
- <sup>50</sup>Tuhan telah memberi penyelamatan besar kepada orang yang dijadikan-Nya raja;  
Dia melimpahkan kebaikan kepada orang yang diurapi-Nya,  
kepada Daud, sampai ke anak cucu selama-lamanya.